

Mulleres de nove países analizan nunha conferencia virtual o impacto da pandemia da covid-19 nas científicas

- O encontro, promovido polo Laboratorio Europeo de Bioloxía Molecular, terá lugar o 9 de setembro e poderá seguirse en aberto
- A conferencia profundará no impacto negativo das medidas de confinamento sobre as científicas e buscará propostas para paliar. Dende o inicio da crise da covid-19, a produtividade das investigadoras experimentou un descenso acusado
- A investigadora fonsagrada Sarela García Santamarina é unha das coorganizadoras do programa

Heidelberg, 17 de agosto 2020.- A covid-19 está a deixar, xunto ás graves consecuencias dende o punto de vista médico, un forte impacto social. Os efectos máis prexudiciais afectan as persoas en situacións de vulnerabilidade, pero a nivel científico tamén provoca efectos negativos. A pandemia evidenciou máis ca nunca nos últimos tempos a importancia social da ciencia, mais tamén está a amplificar disparidades preexistentes no sistema de I+D como a desigualdade de xénero. O Laboratorio Europeo de Bioloxía Molecular (EMBL) xuntará o vindeiro 9 de setembro nunha conferencia virtual un grupo internacional de mulleres líderes en distintos eidos para analizar o impacto da pandemia entre as científicas e propoñer medidas que contribúan a paliar a fenda de xénero na chamada nova normalidade.

A inscrición na conferencia *O impacto da crise da covid-19 nas mulleres na ciencia: desafíos e solucións* é gratuíta e todas as intervencións poderán seguirse en aberto dende <https://www.embl.org/events/covid19-wis/> (Twitter [#wiscovid19](#), e en diferido e gratuitamente a través de Youtube). O programa, dispoñible na mesma ligazón, contará coas achegas da directora xeral do EMBL, Edith Heard, e doutras nove mulleres procedentes de institucións científicas de Alemaña, España, Francia, Reino Unido, Estados Unidos, Nixeria, Arxentina e República Checa. A conferencia xirará arredor de catro eixes: a experiencia das mulleres do sistema de ciencia durante esta crise, as estratexias para minimizar o seu impacto dende a perspectiva de xénero, ferramentas e recursos para a correcta saúde mental durante a crise da covid-19 e o liderado institucional neste contexto.

Risco de involución

Diversos estudos constatan que dende a posta en marcha das medidas de confinamento, como consecuencia do aumento das responsabilidades familiares, a produtividade das científicas experimentou un descenso acusado, mentres que entre os científicos se mantivo estable ou mesmo se incrementou. As consecuencias deste declive aínda non se coñecen con exactitude, pero poderían estenderse no tempo e ter un efecto moi negativo nos avances previos de cara á redución dunha fenda de xénero na ciencia que

atopa, entre outros atrancos, un sistema de avaliación da produtividade arbitrario e anticuado, a pesar de que está demostrado que os equipos de traballo diversos e multiculturais son máis eficientes e innovadores, alertan as coorganizadoras da conferencia, Sarela García Santamarina (A Fonsagrada, 1978), Cristina Viéitez Manrique (León; 1984), e Natalia Gabrielli (Buenos Aires; 1978). As investigadoras son parte do equipo de Heilderberg do EMBL, laboratorio de referencia en ciencias da vida que tamén integra grupos de investigación en Barcelona, Hamburgo, Grenoble e Roma, e o Instituto Europeo de Bioinformática de Hinxton no Reino Unido.

CONTACTOS PARA AS REDACCIÓNS

- **Organizadoras**

Sarela Garcia-Santamarina sarela.garcia@embl.de, teléfono: +49 1729964624

Cristina Vieitez Manrique cristina.vieitez@embl.de, teléfono: +49 15759303778

Natalia P. Gabrielli López natalia.gabrielli@embl.de, teléfono: +49 17620629675

- **Coordinadora de comunicación**

Sara Verstraeten sara.verstraeten@embl.de, teléfono: +49 917630576405